

Mondstuk van die Suid-Afrikaanse aartappelbedryf • Mouthpiece of the South African potato industry

CHIPS

VOL 35 NO 05 • NOVEMBER / DECEMBER 2021

**CERES/KOUE BOKKEVELD-
KULTIVARPROEF ONDER BESPROEING:
DONKERBOS 2020/2021**

**EMPANGENI INFORMATION DAY
A SPUD-TACULAR
LEARNING EXPERIENCE**

**Die GeoFarmer-platform
maak monitering maklik**

**Stuit Alfalfa-mosaïekvirus
in sy spore**

**Potato product exports:
A twelve-month snapshot**

Aartappels SA op die langpad

Deur Willie Jacobs, HUB van Aartappels SA



As die onlangse inligtingstoer van Aartappels SA (ASA) enigsins as 'n aanduiding moet dien van die betrokkenheid en verbintenis wat plaaslike aartappelprodusente tot hul bedryf toon, is ons beslis op 'n goeie plek. Hoewel nog in sy kinderskoene, het die eerste rits besoeke van die inligtingstoer twee dinge duidelik gemaak: ons bedryf staan sterk, en ons produsente is die sout van die aarde.

Die hoofartikel in hierdie uitgawe fokus reeds op die sake wat hoog op die toer se agenda was, en daarom gaan ek nie op daardie besprekings uitbrei nie. Waarop ek graag wil fokus, is die gees van ons bedryf, want uiteindelik is dit die faktor wat ons vorentoe gaan neem en ons produsente deur moeilike tye gaan dra.

Oud en jonk groei saam

Die eerste ding wat my opgeval het is die wonderlike ouderdomsverspreiding van ons bedryfsrolspelers: die inligtingsdae is deur oud en jonk, gevestig en nuut, bygewoon. Dit is goeie nuus vir enige bedryf, want dit spreek van groei asook mentorskap. Die aartappelbedryf is geseënd in hierdie opsig en dit is 'n voordeel wat ons met beide hande moet aangryp.

Geen bedryf kan oorleef sonder nuwe bloed wat deur jare se wysheid gelei word nie. Hopelik kan ASA sy rol hierin behoorlik sement deur die res van die jaar en aanstaande jaar

se inligtingsdae wat nog kom – ons doel is immers om in te lig en by te staan.

“Geen bedryf kan oorleef sonder nuwe bloed wat deur jare se wysheid gelei word nie.

'n Verdere aspek wat my laat regop sit het, was ons produsente se ongelooflike deursettingsvermoë en die gees waarmee moeilike omstandighede aangepak word. Ons land het baie uitdagings, maar droogte en wispelturige weersomstandighede is sleutelfaktore wat die kameel se rug kan breek. By baie van hierdie vergaderings het ons gehoor hoe produsente swaar trek, maar moed hou en planne maak. Hulle is vooruitstrewend en gehard, en beweeg vorentoe.

Dit is ook baie verblydend om te sien en te hoor dat ASA

se deurlopende navorsing en tegniese inligting oor kultivars en aanplantings deur hierdie gemeenskap omarm en toegepas word.

ASA gaan digitaal

Soos wat daar in heelwat mediaberigte verklaar is, gaan ASA sy energie daarop fokus om geïdentifiseerde tekortkominge so spoedig as moontlik aan te spreek. Dit sluit onder andere in die beperkte kommunikasie tussen ASA-personeel en die groter porsie van ons bedryfsdeelnemers en produsente, asook meer intydse beskikbaarstelling van alle relevante kennis en inligting wat na vore kom, soos en wanneer dit versorg en geverifieer is.

'n Klein voorsmakie daarvan sal eersdaags aan die lig kom soos ons gemaklik raak met die akkuraatheid van die voorstellings op ons nuwe platform ... Kyk solank uit vir die Potatoes SA-ikoon in die App Store en op Google Play. Daar sal later meer kennisgewings hieroor uitgestuur word. 🍌